

A Yuh Name Lightening Bolt - By J.A. Hutchinson

Sing yuh sweet ridim song young stallion
Dance yuh wicked reggae dance
Three quarter a dem woulda behave twice as bad
If dem did half di chance

Plenty a dem deh under di quietA wish say dem did come from yard
Wi no apologize fi wi status as Jamaicans
See wi yah … wi big, bad and broad

Tell dem say when Jamaicans come fi wuck wi show
Entime di victory sweet
Wid di dance and di timbrel wi a go celebrate
Wi name Jamaican an a so wi dweet

Bolt, yuh mean much more to wi dan lightning
Yuh a fire, brimstone and thunder
Yuh a di cat mongst di pijin dem inna di bud nest
A wonder bout di Jamaican wonder

An no matter which part a world di Jamaican dem deh
Right now wi a beat wi chest
Kin pupalick and kin wi teet, because wi know
Jamaica … a di best

So dance yuh dance, proud Jamaican stallion
A yuh game dem waan fi colt
Tell dem say a Faada God a run yuh show
An a Him name yuh Lightning Bolt